

Namminersorlutik Oqartussat iluanni aammalu suliffeqarfiiit Namminersorlutik Oqartussat pigisaasa iluanni atorfilittat qullersaasa tullersortaasalu 60 – 70 %-ii piginnaasaqarnikkut tulluartut marlunniq oqaaseqartuunissaat anguniarlugu ukiut qulit ingerlaneranni sulisussarsiuussinermut tunngaveqartitsisussamik atorfinititsarnermut aalajangersimasumik anguniagaqarnissamut periusissiornissamut, ilinniartitaanermullu ilinniaqqinnermullu periusissiamik UPA 2017 sioqqullugu Naalakkersuisut saqqumiussaqaqqullugit peqquneqarnissaannik Inatsisartut aaliangüffigisassaattut siunnersuut

(Inatsisartunut ilaasortaq Peter Olsen, Inuit Ataqatigiit)

pillugu

Inuussutissarsiornermut Aatsitassanullu Ataatsimiitaliap

siunnersuutip aappassaaneerneqarneranut

ISUMALIUTISSISSIONTAA

Inuussutissarsiornermut Aatsitassanullu Ataatsimiitaliap suliarinninnermini ilaasortarai:

Inatsisartunut ilaasortaq Peter Olsen, Inuit Ataqatigiit, siulittaasoq

Inatsisartunut ilaasortaq Randi V. Evaldsen, Demokraatit, siulittaasup tullia

Inatsisartunut ilaasortaq Jens-Erik Kirkegaard, Siumut

Inatsisartunut ilaasortaq Nikolaj Jeremiassen, Siumut

Inatsisartunut ilaasortaq Knud Kristiansen, Siumut

Inatsisartunut ilaasortaq Kelly Berthelsen, Inuit Ataqatigiit

Inatsisartunut ilaasortaq Per Rosing-Petersen, Partii Naleraq

1. Siunnersuutip imarisaa siunertaalu

Namminersorlutik Oqartussani aammalu suliffeqarfinni namminersortitani atorfilittat qullersaasa tullersortaasalu 60 – 70 %-ii piginnaasaqarnikkut tulluartut marlunniq oqaaseqartuunissaat anguniarlugu ukiut qulit ingerlaneranni sulisussarsiuussinermut tunngaveqartitsisussamik atorfinititsarnermut, ilinniartitaanermut ilinniaqqinnermullu aalajangersimasumik anguniagaqarnissamut periusissioqqullugit Naalakkersuisut peqquneqarnissaat siunnersuuteqartup kissaatigaa.

2. Siunnersuutip Inatsisartunit siullermeerneqarnera

Siunnersuut Inatsisartunit siamasissumik tunngaviusumillu oqaluuserineqarpoq. Siunnersuutikkut anguniarneqartut eqqarsaatillu partiinit amerlanerussuteqartunit tapersorsorneqarput. Siunnersuut tapersorsornartoq, siunnersuuteqartulli ineriartornissamut kissaata allatigut aamma anguneqarsinnaasoq Naalakkersuisut oqaatigaat. Naalakkersuisut isumaqarput iliuusissanut allanut peqatigitillugu ilinniartitaanikkut siamasissumik iliuuseqarnissap aallunneqarnerata kingunerissagaa inuiaqatigiinni piginnaasat qaffannerat aammalu taama ineriartortitsinerup malitsigisaanik pisortat nunatsinni inunngorsimasut piffissap ingerlanerani amerliartussasut. Tamanna tunngavigalugu siunnersuut itigartinneqassasoq Naalakkersuisut inassutigaat.

2.1 Kalaallit pisortat sulisussarsiarineqartarneranni periusissat arlallit ataatsikkut ingerlanneqarsinnaasut

Iliusissat arlallit pisortat marlunnik oqaasillit sulisussarsiariniartarnerannut siuarsaataasinnaasut Naalakkersuisut aalajangiiffigisassatut siunnersummut matumunnga akissuteqaamminni nalunaarsoraat Inuussutissarsiornermut Aatsitassanullu Ataatsimiititaliamit maluginiarneqarpoq. Pisortassatut piukkunnartut nunatsinni inunngorsimasut amerlanerulersinneqarnissaat eqqarsaatigalugu suliniutissat taakku pitsaasutut naapertuuttutullu ataatsimiititaliamit isigineqarput¹. Ilaatigut suliniutissat uku Naalakkersuisut akissuteqaammi nalunaarpaat:

- *Sulisut oqaatsinik pikkorissarnissaanik neqeroorfigineqartarput*
- *Pisortat ineriartornissamut pikkorissarnissamut neqeroorfigineqartarput*
- *Pisortassatut piukkunnaatillit nunaqavissut siunissami pisortangorsinnaanissaat siunertaralugu pikkorissarnissamik neqeroorfigineqartarput*
- *Sulisussarsiornermi periusissatut pilersaarut sulisunut Kalaallit Nunaannut immikkut attuumassutilinnut tulluarsagaq*
- *Kalaallit qaffasissumik ilinniagallit atorfinissinnaanissaat siunertaralugu suliffisanik saqqummersitsinernik ukiut tamaasa ingerlatsisoqartarpoq*

Suliffeqarfuit Naalakkersuisoqarfuit ataanni inissisimasut aammalu suliffeqarfuit namminersortitat sulisui suliniutini siuliani pineqartuni peqataanissaminnut periarfissaqartinneqarput.²

¹ "Nunatsinni inunngorsimasut"-nik oqarnermi nunatsinni innuttaasunit nunatta avataani ilinniagaqarlutik, suliartorlutik imaluunniit napparsimanermut atatillugu katsorsartillutik najugaqarallartut meeraat ataatsimiititaliap paasinninnera malillugu aamma pineqarput.

² Immikkoortup UKA 16-imí siullermeerneqarnerani Naalakkersuisut akissuteqaataannit tigulaagaq.

Suliniutit siuliani taaneqartut piffissap ingerlanerani Namminersorlutik Oqartussani taassumalu ataani immikkoortortani pisortatut ilinniartinneqarlutik atorfekalersinnaasut amerleriarnissaannut peqataaqataasinaasut Inuussutissarsiornermut Aatsitassanullu Ataatsimiitaliaq isumaqarpoq. Anguniagassamilli tigussaanerusumik periusissiornikkut Naalakkersuinikkut suliniutigalugu aallarteriigaata siuarsarnejarnissaanik kissaateqarnertut aalajangiiffisassatut siunnersuut una isigineqarsinnaavoq. Atorfinititsisarnermi aqutsinikkut anguniagaqarfiunerusumik periuseqarnissamik taamatullu ilinniartitaanikkut ilinniaqqinnikkullu suliniuteqarnissamik siunnersuuteqartup kissaataa suliniutinut anguniakkanullu Naalakkersuisunit aallarnisarnejareersunut periutsit tunngaviillu eqqarsaatigalugit akerliusutut isumaqarfinginangilaq.

Tassunga atatillugu innuttaasut ilinniagaqaqqortussusiannik qaffassaalluni anguniagaqarfiusumik suliniuteqarneq ingerlatiinnarneqartariaqartoq ataatsimiitaliaq isumaqarpoq. Taamaaliornikkut Namminersorlutik Oqartussani aamma- imaluunniit ingerlatseqatigiiffinni namminersortitani pisortatut atorfekarsinnaanermut maleruagassatigut teknikkullu piginnaasanik pisariaqartunik piginnaasaqalernissamut piginnaaniliisumik ilinniagaqarnissamut tunngavissat pisariaqartut ullumikkornit amerlanernit anguneqarsinnaaqqullugit. Tassunga atatillugu nunanut allamiunut suliassaqarfik pillugu 2016-imi nassuaammi paassisutissat nalunaarneqartut Inuussutissarsiornermut Aatsitassanullu Ataatsimiitaliamit eqqaasitsissutigineqassapput, tassani tikkuarneqarluni:

- *Suliffeqarfiusuni tamani uuttortarlugit nunatsinni suliffeqarfimmi sulisartuni Danmarkimi inunngorsimasut ikiliartuaarput.*
- *2014-imi sulisartut kalaallit 2014-imi pisortaqarfimmi sulisuusut tamaasa isigalugit katillugit 89 %-iupput, 10 %-it Danmarkimi inuusimallutik. 1 % tassaapput nunarsuup sinneraneersut.*
- *Namminersorlutik Oqartussat annertusiartuinnartumik qaffasisumik ilinniarsimasut atorfinitittarpai, piffissamili 2008-2014-imi Kalaallit Nunaanni inunngortutut qaffasisumik ilinniagallit 39 %-init 47 %-inut amerleriarpot.*
- *Nunatsinni kommunit inuussutissarsiummik imaluunniit qaffasisumik ilinniagaqartut amerliartuinnartut atorfinitissippa. Piffissami 2008-2014-imi inuussutissarsiummik ilinniagallinni Kalaallit Nunaanni inunngortut 95 %-init 97 %-inut amerleriarpot, qaffasisumillu ilinniagaqartuni 76 %-init 81 %-inut.*
- *Ingerlatseqatigiiffit namminersorlutik oqartussat pigisaat 2008-mili suliffippassuit annaasimavaat, ingammik Kalaallit Nunaanni inunngortuunerusut appasisumik ilinniagallit suliffisaat, Kalaallit Nunaannili inunngortut tamakiisumik annertussusaat ikiliartorfiusimanngilaq. Ingerlatseqatigiiffinni namminersorlutik oqartussat pigisaanni inuussutissarsiummik ilinniagaqartuni Kalaallit Nunaanni inunngortutut sulisartut 84 %-init 87 %-inut amerleriarpot, sivisunerusumillu ilinniagaqarsimasuni Kalaallit Nunaanni inunngortut 43 %-init 49 %-inut*

*amerleriarlutik*³

Qaffasissumik ilinniarsimasut nunatsinni inunngorsimasut amerliartortut nassuaammit tigulaakkanit takuneqarsinnaavoq, taamaalillunilu siunissami pisortanngorsinnaasut – tamanna kissaatigunikku - nunatsinni inunngorsimasut najugaqartullu amerlanerit pisortatut atorfininnissamut tunngavissinneqarnissaannik Naalakkersuisut anguniagaannut ilanngussinnaasut amerliartorput. Suliffeqarnermi ineriartortitsinerit ullumikkut ingerlanneqareersut siuarsarneqarnissaat siunertalaralugu periusissiorsinnaaneq paasissutissatigut siuliani taaneqartukkut soorunami annikillisarneqanngilaq.

Immikkoortoq 2.1-ip eqikkarnera

Periusissiaq tassaavoq pingarnertut anguniagarisaq siunertarisarluunniit ulluinnarni naalakkersuinikkut allaffissornikkullu ingerlatsinermi tunaartassaq. Suliniutissat aalajangersimasut arlallit pisortassatut piukkunnartut pisortanngornissamut maleruagassatigut piumasaqaatinik piginnaasaqalersinnissaasa saniatigut pisortat nunatsinni inunngorsimasut sulisussarsiariqarsinnaanerinik siuarsaanissamik siunertallit Naalakkersuisut akissuteqaamminni taakkartorpaat. Naak akissuteqaammi oqaatigineqanngikkaluartoq Namminersorlutik Oqartussani ineriartornerup aalajangersimasup siuarsarneqarnissaanik anguniagaqarnermik periuseqarnermilluunniit suliniutit taakku aallaaveqartut ilimagineqarpoq. Periusissiariqarsimasunut sanilliullugu piviusut qanoq ineriartornerannut piffissap ingerlanerani ingerlaavartumik naliliinissamut periusissiat sakkussatut aamma atorneqarsinnaapput. Periusissiat nunatsinni inuiaqatigiit ineriartornerannut naapertuuttumik iluarsineqarlutillu naleqqussarneqarsinnaapput. Kikkulluunniit inuttut taamatullu ilinniakkatigut pisariaqartunik aammalu kulturikkut akulerunnissamik piginnaasallit apeqquatainnagu sumi inunngorsimanerat qanorluunniit inuiaassuseqarnerat oqaatsinik aammalu pisortatut pikkorissarnissamik neqeroorfingineqarsinnaanerat inissaqartillugu akuutinnejarsinnaanerat ilanngullugu aalajangiiffigisassatut siunnersuut una aamma isigineqartariaqartutut Inuussutissarsiornermut Aatsitassanullu Ataatsimiititaliamit isumaqarfingineqarpoq. Kikkulluunniit nunatsinni inuiaqatigiinnut suliniuteqarnissamik kissaateqartut akulerutsinneqarlutillu akuutinnejarsinnaat pingaaruteqarpoq. Nunatsinni sulisinnaasut 27.000-it missaanniipput, taamaattumillu piginnaasallit tamarmik pisariaqartinneqarput. Tamanna tunngavigalugu akuunerulersitsinissaq pillugu Naalakkersuisut nalunaarusiassaata, Inatsisartunit isumaqatigiittunit UPA 2015/131-ikkut peqqussutigineqartup, naammassineqarnissaa aammalu akuunerulersitsinissamut politikissamik aalajangersaanermut atorneqarnissaa ataatsimiititaliamit qilanaarineqarpoq. Akuunerulersitsinissaq pillugu nassuaat aalajangiiffigisassatut siunnersuutip matuma piviusunngortinneqarnissaanut tapertaasinnaasutut ataatsimiititaliamit isigineqarpoq.

³ Issuakkat siulianiittut tamarmik ”nunanut allamiunut suliassaqarfik pillugu 2016-imi nassuaat”-meerput. Inuussutissarsiornermut, Suliffeqarnermut Niunermullu Naalakkersuisoqarfik januar 2016, qupperneq 15.

2.2 Pisortaaneq ataatsimut isigalugu

Pisortaassagaanni ilinniakkatigut, inuttut taamatullu inunnut tunngasunik piginnaasaqarnissaq pisariaqarpoq, pisortaasormi suleqatigiit akornanni pitsaasumik suleqatigiinnissamut pilersitseqataasussaammat. Pisortanik ineriartortitsinermik pikkorissarnissamik aammalu pisortassanik pikkorissartitsinermik Naalakkersuisut neqeroorutaat kiisalu sulisartunik nunatsinnut immikkut attuumassuteqartunik sulisussarsiortarnermi anguniagaqarfiusumik pilersaarut ataatsimiititaliamit iliuusissatut pitsaasutut pisariaqartutullu isigineqarput. Pisortassatut piukkunnaatillit ineriartortinnejarnissaanni “ilitsersorteqarluni sulinerup” atorneqarsinnaanera Inuussutissarsiornermut Aatsitassanullu Ataatsimiititaliamit aamma innersuussutigineqassaaq.

Pisortassanik ineriartortitsinerni taamaattuni pisortassaq inuuusuttoq pisortamik angajullermik misilittagaqarnerusumillu ilitsersuisinnaasumik siunnersuisinnaasumillu ingiaqateqartinnejarnissaq. “Ilitsersorteqarluni sulineq” misilittakkat allaffissornikkullu ilisimasat tunniunneqarlutillu ingerlateqqinnejarnerannik qulakkeereqataasinnaavoq, taamaaliornikkullu Namminersorlutik Oqartussani ingerlatseqatigiiffinnilu namminersortitani pisortaasut ingerlaavartumik ataavartumillu taarserneqartarnissaat qulakkeerneqarsinnaalluni⁴.

2.3 Siunnersummi ingerlatsinermut tunngasut

Pisortani atorfait inuttalerneqarnerannut atatillugu kalaallisut oqalussinnaanerup pingaaruteqartinnejarnissaq eqqarsaatigalugu nunatsinni oqartussaasut periuserisartagaat pillugu ilaatigut kinguliani allassimasunik Inatsisisanik Nalilersuisarfik Kammeradvokatimut tusarniaanermut teknikkut akissuteqaammi allappoq:

Inatsisisanik Nalilersuisarfip paasinninna malillugu atorfinnik inuttaliinermi kalaallisut oqalussinnaaneq aammalu kalaallit kulturiannik inooriaasiannillu nalinginnaasumik ilisimasaqarneq pisortanit oqartussaasunit ullumikkut pingaartinnejartorujussooreersoq (ingerlatsinikkut maleruagassat iluanni, tassungalu ilanngullugu ataatsimut isigalugu piukkunnarnerpaamik atorfinitisitsisussaatitaaneq).

Aalajangiiffigisassatut siunnersuutip piviusunngortinnejarnissaaneranut atatillugu suliassat suliarineqartarnerat pillugu inatsimmut atatillugu mianerisassaqarpoq. Innuttaasunut tunngatillugu pisortat iliuuseqartarneranni makku pingarnertut qulakkeerneqarnissaannik suliassat suliarineqartarnerat pillugu inatsisit siunertaqarpoq:

⁴ <http://www.lederweb.dk/dig-selv/karriereplanlagning/artikel/79551/mentorprogrammer---din-checkliste>

- Ataatsimut naliliineq tunngavigalugu qinnuteqartup piukkunnarnerpaap atorfinitssinnissaannut pisortat oqartussaasut pisussaaffeqarnerat.
- Naliliinermi suliamut tunngasut kisimik ilangunneqarnissaat.
- Naliliinissaq maleruagassanit allaffissornikkut aalajangersarneqarsimasunit mattunneqassanngimmat killilorsorneqaraniluunniit.
- Assigiimmik pinnittussaanermik immikkoortitsinnginnissamillu pisortat oqartussaasut pituttugaanerat.

Aalajangiiffigisassatut siunnersuutip taassisutissartaani allassimasutut kissaatiginartinneqarpoq periusissiap kingunerissagaaj najukkani piukkunnartut siuarsaavagineqarnissaat, taamaaliornikkut Namminersorlutik Oqartussani il.il. pisortatut atorfiit 60 - 70 %-ii qinnuteqartunik piukkunnartunik marlunnik oqaasilinnik inuttalerneqarsinnaaqqullugit. Suliasat suliarineqartarnerannik inatsimmi pisumut naapertuutumik iliuuseqartarnermik tunngaviup kingunerisaanik atorfinnut ataasiakkaanut (atorfiup isumagineqarnissaanut kalaallit oqaasiinik ilisimasaqarneq qanoq pingaaruteqartignersoq aallaavigalugu) qinnueqartunullu ataasiakkaanut (atorfimmum tunngatillugu qinnuteqartup piginnaasai tamarmiusut aallaavigalugit) tunngatillugu naapertuussutsimik nalilersuinerit immikkut ingerlanneqartassapput.

Atorfinitssisarnermut periusissamut atatillugu qulakkeerneqartariaqarpoq maani inunngorsimasut kalaallisut danskisulluunniit oqaaseqanngitsut imaluunniit killilimmik oqaasillit siunertaanngitsumik toqqaannanngitsumillu immikkoortinneqalernerannik nassataqartumik atuutsilerneqannginnissaa naggasiullugu tikkuarneqartariaqarpoq.

2.4 UKA 16-imi siunnersuutip siullermeerneqarnerani allannguutissatut siunnersuut

Aalajangiiffigisassatut siunnersuut una UKA 16-imi siullermeerneqarmat allannguutissatut siunnersuut una Siumup oqaaseqaataani saqqumiunneqarpoq:

Pisortat suliffeqarfiutaanni atorfimmum sulisussarsiornermi malittarisassanut Kalaallisut oqalussinnaanerup piginnaasatut aalajangiisuusutut piumasaqataalersinnejarnissaa pillugu kingusinnerpaamik 1. Januar 2017-imi atuutilersussamik najoqqutassiornissamik Naalakkersuisut suliaqqaqqullugit peqquneqarnissaannik Inatsisartut aalajangiiffigisassaattut siunnersuut.

Aalajangiiffigisassatulli siunnersuut allannguutissatut siunnersuutip ataatsimiitaliamit isummerfigineqarnissaanik ajornakusoortitsisunik arlalinnik ajornartorsiutitaqarpoq.

Allannguutissatut siunnersuut imarisamigut ima annertutigisumik allannerqqusaanngilaq allat siunnersuutit nutaavittut isigineqartariaqarluni. Allannguutissatut siunnersuut matumani

pineqartoq siunnersuutaqqartumit annertuumik allaanerussuteqarpoq, taamaattumillu allannguutissatut siunnersuutip atuussinnaassuseqarnera qularutigineqarsinnaalluni.

Allannguutissatut siunnersuut imarisamigut aalajangiiffisassatut siunnersuutaqqartumit annertuumik allaanerussuteqarmat aalajangiiffisassatut siunnersuutaqqartup siullerneerneqarneranut akissuteqaamminni allannguutissatut siunnersuutip oqaaseqarfiginissa Naalakkersuisut periarfissaqarfigisimanngilaat aammalu paasissutissanik inatsisinullu tunngasunik Inatsisartut allannguutissatut siunnersummik suliarinninnerannut pingaaruteqartunik paasissutissiinnaasimanatik.

Allannguutissatut siunnersuutip oqaasertalersugaanera pissutigalugu allannguutissatut siunnersuutip piviusunngortinneqarnissa pisut ilaanni ingerlatsinermi tunngaviusumik maleruagassanut aammalu isumaqatigiissutitigut pisussaaffinnut akerliusutut ilimagineqarsinnaavoq. Taamaattumillu allannguutissatut siunnersuutip ilaani piviusunngortitsinissamut Naalakkersuisut mattunneqarsinnaallutik.

Allannguutissatut siunnersummi Naalakkersuisunut piffissaliussaq maanna qaangerneqareerpoq, taamaattumillu Naalakkersuinit malinneqarsinnaanani. Taamaallunilu allannguutissatut siunnersuut naapertuukkunnaareerpoq.

2.5 Inuussutissarsiornermut Aatsitassanullu Ataatsimiititaliap allannguutissatut siunnersuutaa

Amerlanerussuteqartut Inuit Ataqatigiit, Siumup Partii Naleqqallu ilaasortaatitaasa allannguutissatut siunnersuut imattoq saqqummiuppaat:

Ilinniartitaaneq ilinniartiteqqiinerillu aqqutigalugit, Namminersorlutik Oqartussat iluanni aammalu suliffeqarfiit Namminersorlutik Oqartussat pigisaasa iluanni atorfilittak qullersaasa tullersortaaasalu ukiut tallimat iluanni 60 – 70 %-iisa piginnaasaqarnermikkut kalaallisut qallunaatullu oqalussinnaasuuunissaat anguniarlugu sulisussarsiuussisarnermut atorfinititsisarnermullu aalajangersimasumik anguniagaqarnissamut periusissioqqullugit Naalakkersuisut peqquneqarnissaannik Inatsisartut aaliangiiffisassaattut siunnersuut.

Siunnersuutaqqartumi ukiunik qulinik piffissaliineq allannguutissatut siunnersuutikkut matumuuna ukiunut tallimanut sivikillineqarpoq. Ammattaaq siunnersuutip kalaallisut danskisullu oqaasertaani assigiinngissut allannguutissatut siunnersuutikkut iluarsineqarpoq.

3. Ataatsimiititaliap siunnersummik suliarinninna

Siunnersuut akuersissutigineqassanersoq Inatsisartunit isumaqatigiissutigineqanngitsoq siunnersummik siullermeerinninnermi paasinarsivoq. Siunnersuutip taassisutissartaa tunngavilersuutaalu ersarissumik oqaasertalersugaapput. Ataatsimiititaliaq tamatumunnga oqaaseqaatissaqanngilaq. Taamaalillunilu suliami apeqquataalerpoq siunnersuutip akuerineqarnissaa Inatsisartunit kissaatigineqarnersoq. Siunnersuut allannguutissatulluunniit siunnersuut akuerineqartariaqarnersoq akuerineqartariaqannginnersorluunniit naalakkersuinikkut naliligassaavoq, tamannalu Inatsisartut kisimik ingerlassinnaavaat. Isumaliutissiissut una aammalu siunnersuut pillugu isumaliutigisani aqutigalugit taama naliliinissamut Inatsisartut Inuussutissarsiornermut Aatsitassanullu Ataatsimiititaliamit tunngavissinniarneqarput.

4. Siunnersuutip aningaasatigut kingunerisassai

Aalajangiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassai siunnersummut tunngavilersuummi allaaserineqassasut Inatsisartut suleriaasianni § 33, imm. 1-imi allassimavoq. Tamanna naapertorlugu siunnersuutip aningaasatigut kingunerisassai siunnersuuteqartup allaaserisimavai.

5. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiit, Siumup Partii Naleqqallu ilaasortaatitaasa Inuussutissarsiornermut Aatsitassanullu Ataatsimiititaliap allannguutissatut siunnersuutaa akuerineqassasoq inassutigaat.

Ataatsimiititaliap isumaqatigiittup Siumup allannguutissatut siunnersuutaa itigartinneqassasoq inassutigaa.

Ikinnerussuteqartup Demokraatineersup matuma kinguliani allassimasutut oqaaseqaateqarluni allannguutissatut siunnersuut taamatullu siunnersuutaqqaartoq itigartinneqassasut inassutigaa.

”Ilanniartitaanikkut suliniuteqarnerup tulleriaarinermi pingarnerusunngortinneqarnissaa partiinit tamanit isumaqatigiissutigineqarmat Demokraatinit iluarismaarneqarpoq. Ineriartornermik inuaqatigiinnillu nukittunerusunik pilersitsinissami tamanna aqutissatuaavoq, ilanniartitaaneq aningaasaliineruvoq siunissamilu kalaallit pisortat amerlanerulernissaannut aammalu pisortat ingerlatsineranni aqtsinerannilu tamani kalaallit oqaasiisa pingarnertut oqaaserineqalernissaannut matuersaataalluni. Piginnaasassanut pisinnaasassallu appartinneqarnissaat Demokraatinit akuersaarsinnaanngilarput,

taamaaliorneq ajorsarneruvoq. Naqqanit aallartittariaqarpugut, atuarfik misissortariaqarpapput meeqqagullu siunissamut piareersarlugit. Oqaasertaani ukiut qulit ukiunut tallimanut allanngortinnejarnissaat isumatusaarnernerussasoq Demokraatinit takusinnaanngilarput - piviusorsiunngilaq. Pitsaanerussaaq ungassumut isiginissarpup misissorlugulu qanoq anguneqassanersut, piffissami taama sivikitsigisumi anguneqarsinnaanngillat, ajoraluartumik. Pisortat aqtsineranni suliassat sulisunit ilinniarluarsimasunit suliarineqarnissaat uatsinnut pingaaruteqarpoq. Tamanna tunngavigalugu aqtsinermi pisortat kalaallit amerlanerit pigilernissaannut piffissap qanoq sivisutigisup atorneqarnissaata ukiuliiffiginissa peqataaffigerusunngilarput. Taarsiullugu ilungersorluta sulisariaqarpugut, tassalu ilinniagaqaqqortussutsip qaffassarnissa. Erseqqissarusupparput innuttaaqatitta kalaallit amerlanerit ilinniagaqarnissaat Demokraatinit kissaatigineqangaarmat, taanna aqutissatuaavoq, tunngaviusumilli pisariaqartitat isiginagit siunnersuutinik taama piviusorsiungitsigisunik saqqummiussineq pallimannngilluinnarpoq. Tullinnguulluni apeqquataalersoq tassaavoq kalaallimi danskisut oqaasillit – taakku sussappat? Tamanna tunngavigalugu siunnersuut itigartinneqassasoq inassutigaarput.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassannngortippaa.

Peter Olsen,
Siulittaasoq

Randi V. Evaldsen
Siulittaasup tullia

Jens-Erik Kirkegaard

Nikolaj Jeremiassen

Knud Kristiansen

Kelly Berthelsen

Per Rosing-Petersen